

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXV No. 19
Oktubre 7, 2004
www.philippinerevolution.org

Editorial


Pasingkion sang Bag-ong Hangaway sang Banwa ang mga armadong opensiba

Igalunsar sang Bag-ong Hangaway sang Banwa (BHB) ang nagapadamu nga mga armadong opensiba batuk sa rehimeng US-Arroyo. Ini ang sabat sang BHB sa panawagan sang Komite Sentral nga pasingkion ang armadong rebolusyon bilang sabat sa

walay tupong nga krisis nga ginalumuyan subong sang pungsod. Ini man ang sabat sang BHB sa mabaskog nga demanda sang pumuluyo nga silutan ang rehimeng US-Arroyo.

Mismo ang rehimeng US-Arroyo ang nagaduso sa pumuluyo sa dalan sang rebolusyon. Walay latid ang pag-ikog-ikog sini sa imperyalismong US. Masupog sini nga ginapamtuman ang pinakamalaut nga polisiya sang

liberalisasyon, pribatisasyon kag deregulasyon. Kahimbong ini sang dalagku nga dumuluong nga korporasyon nga padayon nagapuga sing supergansya halin sa nagaantos nga pumuluyo. Ginahayag sini ang kaugalingon nga baho kag kagarukan sa walay untat nga inaway sa ila kubay kag serye sang nagakahublasan nga mga anomalya kag kurakutan. Malaut sini nga ginasuportahan ang imperyalistang agresyon kag sa bibig pirme sini ang litanya nga "gera kontra-terorismo" sang US agud hatagan-rason ang pasistang pagpanalakay sini sa pumuluyo kag imbitahan ang pag-interbenar sang US sa pungsod. Pat-ud ang pagbaskog sang kahublagang masa sang pumuluyo nga wala na sing masaligan kundi ang maghulag kag magbatu. Tay-ugon sini sa pinakaubod ang daan na nga mahuyang nga pagginahum sang rehimeng US-Arroyo. Kadungan sini, magalunsar sing nagapadamu, nagapabaskog kag mas masunson nga mga taktikal nga opensiba ang BHB bilang suporta sa pagpahamulag kag pagpuhan sang rehimen.



Mga tampok sa isyu nga ini...

Arturo Tabara, masupog nga kriminal kag kontra-rebolusyonaryo

PAHINA 3

Pakusog kag pagpanipalang, katuwang sa pagmina sa Samar

PAHINA 5

Pagabayaran ni Bush ang gera sa Iraq

PAHINA 9



Palaparon kag pasingkion sini ang pagpakig-away gerilya agud abuton ang masa sa madamu nga distrito kag munisipalidad, batakong ang armadong pwersa sang kaaway sa mas madamu nga bahin sang pungsod kag pahinaon ang kapot sini sa mga estratehikong prenteng gerilya nga ginakonsentrahan subong sang AFP.

Pila ka beses nga napamatud-an ang epektibidad sang kombinasyon sang dalagku nga demonstrasyon kag pagbaskog sang mga armadong opensiba sa pagpadasig sang pagpukan sa nagapungko nga rehimen. Indi sini mapukan ang bilog nga sistema pero palaparon kag palig-unon sini ang demokratiko kag rebolusyonaryong kahublagan nga padayon nga magahulag kag nagabatu sa nagaharing sistema tubtub sa kadalagan. Ang paglunsar sang inaway banwa sa balayon sang bag-o nga demokratikong rebolusyon ang pinakamasaligan kag pinakapektibong pamaagi sa paglubad sang krisis. Sa kadalagan lamang ini mapatuman ang mga basehang polisiya nga magatapos sa pagginahum sang imperyalismong US kag lokal nga daku nga burukrata-kapitalista kag agalon nga mayduta sa pungsod.

Abusadong yunit sang AFP, ginsilutan sang BHB sa Cagayan

MABASKOG nga silut ang ginhatag sang Henry Abraham Command sang Bag-ong Hangaway sang Banwa (BHB) sa Cagayan sa abusado nga 17th IB sining Septyembre 30. Suno sa pahayag ni Salvador del Pueblo, tagapamaba sang National Democratic Front sa Northeastern Luzon, pito ka tropa sang kaaway ang namatay kag anum ang napilasan sa ambus nga ginlunsar sang mga Pulang hangaway sa Sityo Ladac, Caruppian, Baggao.

Nakakumpiska ang BHB sang duha ka M14, duha ka M16, mga kagamitan pangkomunikasyon kag iban pa nga gamit panggera kag mga dokumento nga may mataas nga importansya sa paniktik.

Ang mga gin-ambus nga tropa kabahin sang brigada-kadaku nga Operation Phantom nga tatlo ka bulan nga naglunsar sang *strike operations* sa mga banwa sang Baggao, Gattaran kag Alcala.

Madugay na nga ginademanda sang masa nga silutan ang 17th IB bangud imbolbado ini sa mga kaso sang pagpanalbeyds, pagpamigos kag pagpamahog sa mga mangunguma, pwersahan nga pagpagiya sa mga menor de edad sa mga operasyon militar, pagpanghalit sa mga talamnan kag pagpangawat sang mga hayupan sang mga mangunguma.

Pagkatapos sang inaway, ginhatagan sang BHB sing paunang tambal ang mga pilason nga tropa sang kaaway nga nagasurender ukon nakorner na kag wala sing ikasarang mag-away.

Mga suldado, gin-ambusan sa Zamboanga Sibuguey

TATLO ka elemento sang 38th Special Forces Company sang Philippine Army ang namatay sang ambuson sila sang isa ka yunit sang Wilson Feliciano Command sang Bag-ong Hangaway sang Banwa sa Western Mindanao sadtong Septyembre 29. Ginlunsar ang ambus sa Barangay Penaranda, Kabasalan, Zamboanga Sibuguey. Lakip ang mga suldado sa 13-katawong iskwad nga nagapatrulya bandang alas-8 sang aga. Indi man maisip ang kadamuon sang mga pilason nga kaaway samtang wala bisan isa ka kaswalti nga naangkon ang BHB.

Suno sa pahayag ni Ismael Marte, tagapamaba sang PKP-BHB sa rehiyon, nag-abot tubtub 9:15 sang aga ang inaway nga natabo malapit lang sa isa ka detasment sang AFP. Ang mga gin-ambus nga tropa kabahin man sa *maneuver force* sang 102nd Infantry Brigade.

Isa ka patay kag isa ka pilason lang ang gin-ako nga kaswalti sang 102nd Bde. Pero ginpangkanyon naman ang mga komunidad sang mga sibilyan sa mabulubukid nga bahin sang Barangay Diampak nga ginapatihan nila balwarte sang BHB.

Mabaskog nga ginpakamalaut ni Marte ang pagpanganyon bilang hayagan nga paglapas sa CARHRIHL kag mga internasyunal nga pagsulundan sang gera.



Tuig XXXV No. 19 Oktubre 7, 2004

Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan. Malab-ot kami paagi sa e-mail sa:

angbayan@yahoo.com

Kaundan

Editoryal	1
Mga taktikal nga opensiba	2
Tabara, kriminal	3
kag kontra-rebolusyonaryo	3
Pasistang pakusog kag paniplang,	5
katuwang sa pagmina sa Samar	5
Lapnagon nga paghalin sa Hacienda	6
Luisita, ginapamatukan	6
Lapnagon nga gutom	7
GSIS: Pahalinon si Winston Garcia	8
Pagabayaran ni Bush	9
ang gera sa Iraq	9
Balita	10

Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas.

Detenidong gerilya, ginhilway sang BHB

MADINALAG-ON nga ginhilway sang Ka Paking Guimbaolibot Red Partisan Brigade sang Bag-ong Hangaway sang Banwa (BHB) si Jordan Donillo (Ka Jovan) sa isa ka 10-minutos nga operasyon sadtong Septyembre 30, bandang alas-8:30 sang aga sa Km.74, Mawab, Compostela Valley.

Si Ka Jovan, upod ang apat pa nga detenido lulan sang salakyan sang Bureau of Jail Management and Penology (BJMP) nga padulong sa banwa sang Nabunturan kag gwardyado sang apat ka tinawo sang BJMP sang ginlunsar ang operasyong paghilway. Ginpadulog sang mga Pulang partisano ang salakyan kag sang wala ini magpundo napilitan sila nga palukpan ini. Napilasan ang mga gwardya kag nakumpiskahan sila sang tatlo ka pistolang 9 mm, isa ka .45, isa ka shotgun kag isa ka radyong VHF.

Polisiya kag praktika sang BHB ang pagpangita kag paghingalit sa anuman nga kahigayunan para mahilway ang sin-o man nga kaupod halin sa mga manugtortyur kag manugpatay-tawo nga militar kag halin sa garuk nga sistema sang hustisya nga kontrolado sang mga reaksyunaryo. Lain ini sa polisiya sang AFP kag PNP nga nagahatag lang importansya sa interes sang nabihag nga upisyal kag nagapabaya sa iban pa.


Agud takpan ang ila kahuy-anan, ginimbento sang PNP ang estorya nga gindukot kuno sang BHB si Ka Jovan agud iatubang siya sa pagbista bangud sa paghatag niya kuno sang importante nga impormasyon sa kaaway.

Samtang, sa kaangot nga balita, sinalakay sang isa ka platon sang BHB sadtong gab-I sang Septyembre 19 ang Magdum Wood Corp. Industry sa San Isidro, Davao Oriental kag nakakumpiska sang pila ka matag-as nga kalibreng armas. Sadtong adlaw man nga ina, ginreyd sang isa ka yunit sang BHB ang detatsment sang PNP sa Pantukan, Compostela Valley kon sa diin napatay ang isa ka pulis. AB

Arturo Tabara, masupog nga kriminal kag kontra-rebolusyonaryo

Si Arturo Tabara, masupog nga kriminal kag kontra-rebolusyonaryo, natalana nga arestuhon sang isa ka espesyal nga yunit sang Bag-ong Hangaway sang Banwa (BHB) sadtong Septyembre 26 sa Quezon City sigun sa mandu sang espesyal nga hukmanan sang pumuluyo. Ugaling bangud armado kag nagbatu si Tabara, napilitan nga makig-away ang *arresting unit* sang BHB. Napatay sa engkwentro ining si Tabara. Napatay man ang upod niya nga si Stephen Ong, nga armado kag nagtuyo magpangapin kay Tabara.

Ang espesyal nga hukmanan sang pumuluyo gintukod sining karon lang agud bistahon ang mga kasong kriminal nga napasaka batuk kay Tabara, pinuno sang bandido kag paramilitar nga grupong CAFGU-RPA-ABB. Si Tabara



ginapadakup sang espesyal nga hukmanan sang pumuluyo agud atubangon ang mga kriminal nga kaso nga ginpasaka batuk sa iya.

Tuman kalaba na sang listahan sang mga kaso ni Tabara batuk sa pumuluyo kag rebolusyonaryong kahublagan, ilabi na sang ginsipa siya sa Partido sadtong 1992.

Lakip sa mga ginpasaka batuk kay Tabara ang pagmandu sang

paghold-ap sa isa ka bangko sa Maninigon, Bayawan City, Negros Oriental sadtong Mayo 8, 2002 nga ginkamatay sang apat ka empleyado sang bangko. Suno sa ginpasaka nga reklamo, mismo si Tabara ang nagmandu sa mga tinawo sang

CAFGU-RPA-ABB nga ipatuman ang pagpangholdap nga ini.

Sadtong Agosto 2003, may mga ginpasaka man nga reklamo sang paglapas sa tawhanon nga kinamatarung batuk kay Tabara ang pumuluyo sang Panay. Nakadokumento ang nagkalain-lain nga mga kaso sang pagpamahog, pagpangilkil, pwersahang rekrutment sa CAFGU kag iligal nga pagpanablon. Ginhi-

ngadlan man sa nasambit nga reklamo ang grupo nanday Demetrio Capilastique (Hugo) kag Rufino Cadugo (Rocky) sang CAFGU-RPA-ABB, nga lunsay mga *asset* man sang Military Intelligence Group.

Ginhingadlan man si Tabara sa mga reklamo sang pagpang-ipit sa pumuluyo sang mga tinawo sang CAFGU-RPA-ABB nga nagahimo sang mga tsekpoynt kag mga mapanghalit nga operasyong militar sa madamu nga lugar sa Panay up-

od ang Philippine Army. Ginareklamo nga ang mga operasyon nga ini direktang awtorisado ni Tabara kag bahin sang kasugtanan sa tunga sang gubernong Arroyo kag sang CAFGU-RPA-ABB.

May napasaka man nga mga kaso sang armadong pagpangilkil batuk kay Tabara. Sa mga reklamo nga napasaka sa espesyal nga hukmanan sang pumuluyo, si Tabara ang naghatag sang direktang mandu sa CAFGU-RPA-ABB nga magkulekta sang indi magnubo sa P1,200 kada bulan sa kada barangay nga sakup sang ila operasyon. Sakup man sang amo nga mandu ang pagpangilkil sa kada byahe sang mga manugtablon sa Panay.

Si Tabara ginareklamo man nga nagpagamit sa CAFGU-RPA-ABB bilang mga bayaran nga hurong sa mga demolisyon sa Boracay Island, Malay, Aklan batuk sa mga imol nga nagapuyo didto. May reklamo man kay Tabara sa pagpagamit niya sang iya mga armadong tinawo bilang mga bayaran nga manugpatay-tawo kag *goons* sang dalagku nga pulitiko kag negosyante sa Negros kag Panay tulad nanday Eduardo "Danding" Coju-

angco, Gov. George Arnaiz sang Negros Oriental, Nene dela Cruz, anay alkalde sang Don Salvador Benedicto, Negros Occidental, Mayor Santiago Barcelon, Jr. sang Escalante, Negros Occidental kag kay Congressman Ignacio Arroyo, bayaw ni Gloria Arroyo.

Suno sa mga dokumento nga kapot sang espesyal nga hukmanan sang pumuluyo, ginapagamit ni Tabara ang CAFGU-RPA-ABB kay Cojuangco sa pagsabwag sang terorismo kag pagpamigos batuk sa mga mangunguma sa malapad nga plantasyon sang mangga, *cassava* kag mais sa Negros.

Ginareklamo man si Tabara sa paghatag awtorisasyon sa iya mga tropa nga patyon ang 70 anyos nga si Pedro Trabajador (Tay Pedring) sadtong Marso 1, 2002 samtang nagapauli sa Sityo Tanquinto, Barangay Mabini, Escalante City. Si Trabajador myembro sang National Federation of Sugar Workers nga aktibo nagabatu sa lapnagon nga pagpang-agaw sang kampo ni Cojuangco sa duta sang mga mangunguma sa lugar para sa ginapalapad nga plantasyon sang balinghoy kag mais.

Luwas sa Negros kag Panay, ginaimbestigahan man ang mga reklamo nga ginahatagan sang armadong proteksyon ni Tabara ang Red Vigilantes Group, isa ka sindikato sang iligal nga droga, *kidnap-for-ransom* kag iban pa nga buluhaton *gangster* sa Nueva Ecija.

Napasaka man sa espesyal nga hukmanan sang pumuluyo ang tuman kadamu nga reklamo sang mga buluhaton kriminal kag gangster batuk kay Tabara sadtong nakapaidalum pa siya sa rebolusyonaryong kahublagan. Tampok sa mga ini ang pagpangawat sang masobra P15 milyon sadtong 1990. Suno sa imbestigasyon, ang kwarta nga ini yara sa paghinago sang isa ka abyan nga tinyente-koronel sang AFP kag subong nakadeposito sa US.

Napasaka man sa espesyal nga hukmanan sang pumuluyo ang reklamo sang pagkidnap kay Roger Florete, tag-iya kag presidente sang Bombo Radyo-Philippines, sadtong 1989 sa Iloilo City. Ang pagkidnap kay Florete gintigayon kahimbon si Romulo Kintanar. Nagbayad sang P15 milyon si Florete antes siya ginhilway. **AB**

Ang timbanganay ni Tabara kag reaksyunaryong rehimen

Si Tabara ang tagapangulo sang kontra-komunistang RPMP-RPA. Gintukod niya ini makaligad ginsipa siya sa Partido sadtong 1992 bangud sa iya kriminal nga mga salabton batuk sa Partido kag rebolusyonaryong hublag.

Sadtong 1997, nagsimpon sila sang pwersa sang ABB ni Nilo dela Cruz (alyas Sergio Romero) sa katuyuan nga batuan ang BHB kag para sa pagpadayon sang ila kriminal nga buluhaton.

Direkta ini ginasuportahan kag ginapundohan sang rehimen Arroyo kag ginaarmasan sang AFP. Nagserberbi ini nga *private army* ni Eduardo "Danding" Cojuangco kag iban pa nga dalagku nga asendero sa Negros.

Nakig-areglo ini sadtong Disyembre 2000 sa rehimen Estrada kag sa rehimen Arroyo sadtong Pebrero 2001.

Ang barkadahan ni Tabara-dela Cruz, nga suportado sang kriminal nga sindikato ni Panfilo Lacson, anay hepe sang Philippine National Police, ang yara sa likod sang pagpatay kay Filemon "Popoy" Lagman sadtong Pebrero 2001. Ginawayan nila ang P400 milyon nga suhol kay Lagman sang Public Estates Authority (PEA)-Amari para sa pagpalayas sa linibu-libo nga imol nga pamilya halin sa Freedom Island sa Paranaque.

Sadtong Pebrero 2001, sa pinirmahan nga "*clarification document*"

nanday Tabara kag sang rehimen Arroyo, ginbilang "espesyal nga milisya" ang RPA-ABB kag nakipagkoordinar ini sa AFP sa mga operasyon batuk sa BHB. Para diri, nagsugot ang rehimen Arroyo nga mag-isyu sang matag-as nga kalibreng armas sa RPA-ABB. Sang ulihi, nakilala na ini bilang "CAFGU-RPA" sa idalum sang 3rd Infantry Division sang AFP.

Bunga sang himbunanay nga ini, aktibo ang papel sang RPA-ABB sa pagpatay sa mga kadre kag katapu sang Partido kag BHB kag sa lapnagon nga dislokasyon kag kabudlayan sang masang mangunguma bunga sang mga operasyong militar nga ginlalunsar sang mga tingub nga pwersa sang RPA-ABB kag AFP. **AB**

Pasista nga pakusog kag pagpaniplang, katuwang sang imperyalistang pagmina sa Samar

Halin sadtong Hulyo, nagsingki ang militarisasyon sa mga banwa sang San Jose de Buan, Matuguinao, Oras, Paranas, Can-avid, Motiong, Jiabong, Dolores kag Maslog sa isla sang Samar. Ang ulihi nga apat ka banwa ang may pinakamadamu man nga kaso sang paglapas sa tawha-non nga kinamatarung sang mga mangunguma. Diri man ang konsentrasyon sang mga ginaplano nga pagmina sa isla.

Mismo ang Armed Forces of the Philippines ang nagaako nga ang mabaskog nga operasyon militar *clearing operations* para sa mga ginaplano nga "proyekto pangkauswagan" nga wala sang iban kundi ang lapnagon nga pagmina sa isla nga ang pagapangunahan sang mga imperyalistang korporasyon.

Nagsugod na ang aktibong eksplorasyon sa pagmina sang Bauxite Resources, Inc., (BRI) kag Alumina Mining of the Phil., Inc. (AMPI). Samtang, may 16 pa nga kumpanya nga nagahulat na lang nga maaprubahan ang ila aplikasyon nga maghimo man sang eksplorasyon. Sa tian nga maaprubahan ang tanan nga ini, magasakup ang ila operasyon sang 86,700 ektarya.

Sadtong 2003, may yara man 30 kumpanya nga nagplatar sang aplikasyon para magmina sa 97,256 ektarya sa Leyte.

Sakup sang BRI ang San Jose de Buan, Matuguinao, San Jorge kag Gandara samtang sakup naman sang AMPI ang mga banwa sang Motiong, Hinabangan kag Paranas, tanan sa Western Samar. Dose mil ektaryas ang kabilugan nga erya sang ila mga konsesyon.

Ginainteresan sang BRI, AMPI

kag iban pang aplikante ang *bauxite* nga ginahalinan sang mineral nga *aluminum*.

Yara sa Samar ang pinakamanggara-non nga deposito sang *bauxite* indi lamang sa Pilipinas kundi sa bug-os nga Asia. May ara ini nga 242 milyon tonelada kag konsentrado ini sa kagulangan kag kaigangan (lugar nga matalum nga bato nga *limestone*) nga yara sa pusod sang Samar. Sadtong 2002, indi magnubo sa \$21 bilyon ang kabilugan nga bili sang mga deposito diri, suno sa konserbatibong pagtanyang sang *World Metal Statistics*. Ginagamit ang *aluminum* sa paghimo sang mga eroplano, tren, kotse, barko, tangke kag iban pa nga salakyan, sa mga gamit sa pagluto, mga pyesa sang makina, kable sang kuryente kag iban pa.

Subong pa lang ginapanan-aw na ang kahalitan nga pagatugahon sang malaparan nga pagmina sa isla. Una, isa sa masami nga pamaagi sang pagmina sang *bauxite* amo ang *strip mining* ukon pagkutkut sang duta (sa baylo nga magbuhat sang *tunnel*) para abuton ang mineral nga relatibong

manabaw lang ang pagkalubong. Pagawaskon sini ang anuman nga yara sa ibabaw pareho sang kaigangan, nga indi na mabalik liwat. Mabudlay man tubuan sang tanum ang anuman nga lugar nga maagyan na sang *strip mining* bangud naga-kadala sa pagkutkut ang pinakamasustansyang bahin sang lupa.

Sakup man sang 86,700 ektaryang ginatarget sang mga aplikante sa pagmina ang *headwaters* ukon ginahalinan sang 25 mayor nga suba sa Samar. Kon nagakaproblema sa polusyon ang mga ini bunga sang mga ginahaboy nga makahililo nga basura sang mga minahan, apektado indi lang ang mga suba kundi ang mga lapusan sini-ang baybayon sa Pacific Ocean sa sidlangan nga bahin sang isla, ang Samar Sea sa naaminhan-sidlangan kag ang Maqueda Bay sa timog-nakatundan. Ang tanan nga ini mayor nga mga pangisdaan sa Pilipinas kag bilog nga Asia.

Luwas sa kalakasan sang militarisasyon, ginagamit sang mga imperyalista kag reaksyunaryong estado ang mga grupo kag programa nga kuno nagasimpatiya kag nagadam-pig sa kapalibutan, tulad sang Samar Island Biodiversity Project (SIBP) para ilikaw ang atensyon sang pumuluyo sang Samar sa importante nga isyu kaangot sang imperyalistang pagmina.


Ang SIBP programa nga gintukod sadtong Hulyo 2001 sang Department of Environment and Natural Resources (DENR) sa bulig sang nagkala-in-lain nga dumuluong nga ahensya pareho sang USAID kag Rockefeller Group of Companies. Tuyo kuno sang SIBP nga ipreserba ang 470,000 ekta-ryang kagulangan sa pinakasentro sang Samar nga ginatawag sini nga Samar Island National Park (SINP). Kon napatuman na ang SINP, palaya-son ang pumuluyo nga nagaestar kag nagapangita pangabuhian sa nasambit nga lugar, nga naga-sakup sa mga bahin-bahin sang 28 munisipalidad sa tatlo ka prubinsya sang Samar. Wala sang programa ukon pondo ang SIBP para pun-an ang kinahanglanon sang ginatus-gatos libo katawo nga mapaebakwit sang proyekto. Pero sang magpresentar sang aplikasyon para sa Mineral Production Sharing Agreement (MPSA) ang BRI kag AMPI sadtong Mayo 2002, gin-aprubahan ini sang DENR sadtong tuig man nga ina kag wala karason-rason nga ginpwera sa ginapreserba nga kagulangan ang mga lugar nga may pinakamataas nga konsentrasyon sang *bauxite*, lakip na ang mga konsensyon sang BRI kag AMPI.

Wala sang ngipon ang SIBP nga pamatukan ang mga plano sa pagmina kag hayagan man nga ginamanduan sang reaksyunaryong gubyrerno nga indi magpasilabtan ang nasambit nga plano.

Desidido ang bangkrap nga rehimeng Arroyo nga pasanyugon ang pagmina sang mga dumuluong nga korporasyon sa Pilipinas para may dugang ini nga pwede kuhaan sang pondo. Kabaylo sini ang sarisari nga insentibo tulad sang mga *tax holiday* kon sa diin minimal lang ang pagabayaran nga buhis sang mga kumpanya sa pagmina sa sulod sang tubtub 10 tuig; kinamatarung magluwas sang 100% sang ila tubo kag kapital; kinamatarung sa anuman nga patubig ukon tablon nga makit-an sa sakup sang ila kunsesyon (*water and timber rights*); kag kinamatarung magpalayas sa sin-uman nga nagapuyo diri (*easement rights*).

Pakusog kag pagpaniplang ang magkatuwang nga armas sang rehimeng Arroyo batuk sa pumuluyo sa maitom nga padihot sini nga isubasta ang pungsodnon nga patrimonya sa mga dumuluong. Sa Samar kag sa iba pan nga bahin sang pungsod nga subong ginahalitan ukon nagahana ang pagpanghalit sang mga imperyalistang kumpanya sa pagmina, wala sang iban nga malauman ang pumuluyo kundi ang mabaskog nila nga paghiliusa kag pursigido nga paghimakas.

Pagpahalin sa Hacienda Luisita, ginapamatukan



Serye sang mga aksyong protesta ang ginsug-alaw sang mga mamumugon sa uma sa indi matarung nga lapnagon nga pagpahalin sa Hacienda Luisita, Inc. (HLI). Suno sa Alyansa ng mga Manggagawang-Bukid sa Hacienda Luisita (AMBALA) kag lokal nga unyon diri, 327 mamumugon sa uma ang ginsipa sa trabaho sadtong Agosto 26.

Ginabalibad sang HLI nga naputo kuno ang kumpanya sadtong 2002 kag 2003 gani kinahanglan pahalinon ang mga mamumugon sa uma.

Nauna nga ginpahalin sa trabaho ang siyam ka lider sang unyon. Ginhimo ang pagsipa sa mga lider sang unyon isa ka bulan antes ang nakatalana nga CBA sining Septyembre agud pahinaon ang unyon nga magaatubang sa pagsugilanon.

Ginpwera sang mga pulis kag militar ang mga aksyong protesta nga ginhimo sang mga mamumugon sa uma bahin sa pagpahalin. Tinirgas sang mga pulis ang mga nagralli sadtong Agosto 27. Ginkasuhan naman sang Central Azucarera de Tarlac (CAT), isa pa ka kumpanya sang mga Cojuangco, sang *disturbance of public order, alarm and scandal, malicious mischief* kag *trespass to property* ang 22 katapu sang unyon sang mamumugon bangud sa aksyong protesta sa sulod sang kumpanya sadtong Agosto 30. Makahalam-ut ang pagpasaka sang kaso nga *trespassing* sa mga mamumugon sa uma nga kuno mga *stockholder* sang HLI suno sa tuso nga padihot nga Stock Distribution Option (SDO) kag kon amo mga tag-iya sang kumpanya.

Dugang sa pagpang-ipit sa mga mamumugon sa uma ang deployment sang Yellow Army sa sulod sang asyenda. Ang Yellow Army ginabug-os sang mga gwardya sang HLI nga nagatindog nga *private army* sang mga Cojuangco. Ginaharas kag ginapahug sang mga ini ang mga mamumugon sa uma kag ila mga pamilya, kag ginalapak ang ila mga tawhanon nga kina-

matarung. Luwas pa sa Yellow Army, nagaluntad man sa apat sang napulo ka barangay sa asyenda ang mga detasment sang pulisya, militar kag CAFGU nga imbolbado man sa paglapas sa tawhanon nga kinamatarung sang mga mamumugon sa uma sa asyenda.

Halin sadtong 1989, nag-abot na sa 1,009 mamumugon sa uma ang ginpahalin sa trabaho sa Hacienda Luisita. Luwas sa lapnagon nga pagpahalin, madugay na nga ginabatas sang mga mamumugon sa uma sa 6,453 ekтарыang Hacienda Luisita ang tuman kanubo nga pagpanuhol, pagbungkag sa unyon kag militarisasyon. Sa *privilege speech* sadtong Setyembre 6 ni Rep. Rafael Mariano sang Anakpawis, ginpahayag niya nga nagabaton ang mga mamumugon sa uma sa Hacienda Luisita sang suhol-ulipon nga P9 lang kada adlaw-tuman kalayo sa pinakanubo na nga P280 minimum nga sweldo sa Central Luzon.

Ang SDO nga ginakasangkapan sang mga Cojuangco labi lang nagpalala sa kabudlayan sang mga mamumugon sa uma sa Hacienda Luisita. Suno sa SDO, sa baylo nga ipanagtag ang duta sa mamumugon sa uma, sapi lang sa ulumhan ang ipanagtag sa ila. Suno sa SDO, *stockholder* ang mga mamumugon sa uma sang 33% lang sang HLI. Labi nga kontrolado gihapon sang dalagku nga agalon nga mayduta pareho sang mga Cojuangco ang mga ulumhan.

Ginpatuman man sang pamilyang Cojuangco ang polisiya "*no work, no stocks, no dividends*." Angot sini, ginapatrabaho ang mga mamumugon sa uma sang 80 adlaw lang kada tuig.

Ginasulong subong sa Kongreso sang mga tiglawas sang mga progresibong partidong Anakpawis kag Gabriela ang pagpausisa sa SDO sa Hacienda Luisita.

Nagmartsa ang linibo nga mamumugon sa uma sadtong Setyembre 15 kag 16 halin sa Hacienda Luisita kag naghiwat sang overnight vigil sa Ninoy Aquino Plazuela. Nagkadto sila sa *city hall* kag *provincial capitol* masunod nga adlaw. Nagpagguwa sang resolusyon ang mga progresibong partido sa Kongreso. Ginmiting man sang *provincial board* ang mga mamumugon sa uma kag maneydsment sang asyenda, pero wala magtambong ang HLI kag ang DAR bisan malapit lang sa kapitolyo ang upisina sang DAR.

AB

Lapnagon nga kalagutmon kag kaimulon sa pungsod

Madugay na nga nagamurahag nga kamatuoran ang lapnagon nga kagulutmon kag kaimulon sa pungsod. Gani indi katingalahan ang resulta sang sarbey sang Social Weather Station (SWS) nga nagasaad nga 15.1% ukon isa sa ka-



da pito ka pamilyang Pilipino ang nakaagi sa nagligad nga tatlo ka bulan (halin Hunyo tuhtub Agosto) sang bisan isa tion nga wala sila sing makaon. Nagtaas sang tatlong pilo ang numero sang mga nagsabat sini kon ikumparar sa nagligad nga tuig.

Suno sa sarbey, pinakamadamu ang numero sang mga gutom kag imol sa Mindanao (23%). Nagtaas ini sang apat ka beses halin Setyembre 2003. Nagapangaduha ang Metro Manila (15.7%) kon sa diin masobra doble ang gindaku sang numero sang mga gutom kag imol halin sa 7.3% sadtong isa ka tuig. Samtang, 11.3% ang pigura para sa bilog nga Luzon (nagtaas halin 4.7% sadtong 2003). Naglista sang 13.3% ang Visayas, halin sa 4.3% sadtong isa ka tuig.

Kon usisaon mas mataas pa diri ang aktwal nga pigura. Suno sa iban nga estadistika, nagaabot sa 70% sang populasyon sang Pilipinas ang indi makakita sang bastante para masabat ang pinakabasehan nga mga kinahanglanon nila sa pagpangabuhin. Nagaguwa ang resulta sang sarbey sa panahon nga dalayon ang pagtaas sang presyo indi lang sang pagkaon kundi sang iban pa nga basehang galastuhan pareho sang bayad sa kuryente, tubig, LPG, gaas kag pamasaha.

Sa baylo nga atubangon ang kamatuoran nga ang iya makaimperyalista kag kontra-pumuluyo nga polisiya amo ang nagabungang pagkaguba sang mga produktibong pwersa, pagtibusok sang produksyon, pagkalubong sa depisit kag utang, lapnagon nga pagkaputo, kag lapnagon nga disempleyo, kaimulon kag kagulutmon, ginatudlo sang rehimeng Macapagal-Arroyo ang basol sa rebolusyonaryong armadong kahublagan sang BHB kag pumuluyong Moro kag sa mga pagguwa nga paktor tulad sang bagyo kag iban pa nga kalamidad.

Plano sang rehimen nga magpatuman sang mga pakonswe-lo-de-bobo nga sabat pareho sang paghatag sa mga imol sang *food coupons* ukon mga papeles nga mahimo ibaylo sa pakitang tawo nga tambal lamang kag indi makasabat sa mabaskog nga kinahanglanon sang pumuluyo.

Magapadayon ang paglala sang kagulutmon kag kaimulon sa pungsod tuhtub indi matukod ang isa ka sistema nga matuod-tuod nga hilway, mainuswagon kag maatipanon sa pumuluyo.

AB

Singgit sang mga taga-GSIS:

Pahalinon si Garcia!

Padayon nga ginapamilit sang mga empleyado sang Government Service Insurance System (GSIS) ang pagpahalin kay Winston Garcia, presidente kag *general manager* sang GSIS, bangud sa tuman nga kagarukan kag paghugakum niya sing dalagku nga pribilehiyo halin sa pondo sini.

Kapyot-tuko sa iya pusisyon si Garcia, sa pihak sang sunod-sunod nga mga piket-rali nga ginabuhat sang mga empleyado sa pagpamuno sang Kapisanan ng mga Manggagawa sa GSIS (KMG) sa atubang sang talatapan nasyunal sang GSIS sa Maynila humalin sining ulihi nga si mana sang Septyembre. Sa mandu ni Garcia, tinirgas kag ginbombahan sang tubig ang mga nagaprotesta sadtong Septyembre 28 nga ginkapilas sang 20 mamumugon. Pito sa ila ang malubha nga napilasan.

Amo na lamang ang kaakig sang mga taga-GSIS bangud sa pihak sang ginapabugal ni Garcia nga ginkita nga P40 bilyon sang GSIS halin sa kontribusyon sang 1.5 milyon nga myembro sini, mabudlay katama mag-utang kag magbaton sang benepisyo ang mga ordinaryong empleyado sang gubyrno. Malaut pa, ginmandu ni Garcia nga padakuon halin 9% pakadto 12% ang pilit nga ginabuhin sa sweldo sang mga empleyado ng gubyrno nga hulog sa GSIS bisan wala sang ginapatuman nga pagtaas sa sweldo. Partikular nga nagreklamo ang mga manunudlo sa mga pangpublikong eskwelahan, nga nagabug-os sing pinakadaku nga numero sang mga myembro sang GSIS. Nagaabot sa P12 bilyon ang kontribusyon sang 500,000 manunudlo kag iban pa nga empleyado nga nagatrabaho sa mga pangpublikong eskwelahan. Pero ginagamit subong nga tapalan


sang GSIS ang indi areglado nga pagrekord sang ila mga ginhulog na sa GSIS kag mga kantidad nga ginbayad na nila sa utang para abangan ang pagpautang sa mga manunudlo kag *non-teaching personnel*.

Sa pihak nga bahin, sadtong Nobyembre 2003, nakakuha sang P11 milyon nga utang para sa pabalay si Garcia pagkatapos lang sang duha ka adlaw.

Sa una nga 10 bulan pa lang sang iya pagpungko sa GSIS, nangayo na siya sang mga *cash advance* nga nagakantidad sang P5.25 milyon, kag tubtub subong wala pa siya sang ginsumiter nga paathag kon paano kag diin ini gingasto. Halin Septyembre 2003 tubtub Hulyo 2004, nagpatuhaw man sang P6.9 milyon si Garcia para sa "sarisaring galastuhan."

Nabuyagyag ang mga kwestyunableng proyekto nga ginagamit ni Garcia sang pondo halin sa ginpangabudlayan sang mga ordinaryong empleyado. Isa ka halimbawa ang pag-aprubar ni Garcia sang proyekto para sa *computerization* sang mga operasyon sang GSIS sa kantidad nga P700 milyon samtang pwe-de ipatuman ang nasambit nga proyekto sa kantidad nga P40 milyon lang.

Nagagasto man si Garcia sang P300,000 kada bulan para sa mga anunsyo para sa GSIS kag P200,000



bulan-bulan bilang bayad sa personal niya nga mga abogado. Gin-aprubahan ni Garcia ang pagpautang sang P1 bilyon sa Public Estates Authority; ang paggasto sang P611.8 milyon para magbakal sang duta sa London para sa embahada sang Pilipinas didto; kag pagbakal sing malahalon nga pintura tulad sang *Parisian Life* ni Juan Luna nga nagabalor sang P45.4 milyon.

Pinakaulihi nga anomalya nga nabuyagyag ang pagpabor ni Garcia sa Union Bank, nga ginatag-iyahan sang mga Ayala, bilang deposito-han sang binilyon nga pondo sang GSIS. Ang mga Ayala ginakilala mga tagasuporta sang nagaharing paksyong Arroyo.

Indi basta-basta nga buhian ni Arroyo si Garcia. Lakip si Garcia sa isa ka poderosong pamilya sang mga pulitiko sa Cebu, nga nag-angkon sang daku nga papel sa pagkakuha kuno ni Arroyo sang milyon nga boto halin sa prubinsya nga ini kag naging yabi sa pagdaug niya kuno sa eleksyon. Sa sini, ang padayon nga pagpabilin ni Garcia sa poder kabahin sang pagbayad ni Arroyo sang kabalaslan sa mga Garcia.

Ginakulbaan man si Arroyo nga kon pahalinon niya si Garcia, ibuyagyag sini ang pagka-imbolbar ni Arroyo kag sang mga tawo nga suod sa iya sa kwestyunable nga maanomang transaksyon nga ginadalalahan ni Garcia kag sang GSIS. AB

Pagabayaran sang rehimeng Bush ang pagpanalakay kag pagpanakup sini sa Iraq

Walay basehan, iligal kag sayup ang pagpanalakay kag pagpanakup sang imperyalistang US sa Iraq. Liwat naman ini nahatagan-tum-ok sa atubang sang naulihi pero wala sing paliku-liko nga mga pahayag sang pagpamatuk sang United Nations, mga personalidad kag mga pungsod nga sadto naghapos kon indi man nagsuporta sa pagpanalakay sang US sa Iraq.

Sa atubang sini, wala magpanyayo sang pasaylo ukon nag-ako ang papet nga rehimeng Arroyo sa kasaypanan sini nga suportahan ang isa ka gera nga nagapatay kag nagahalit sang minilyun-milyong sibilyan kag nagasamad sa kabuhi kag ekonomya sang isa ka independente nga nasyon.

Masobra isa ka tuig na ang nagligad humalin salakayon sang US ang Iraq. Antes pa man magtupa ang unang bomba, tampok na ang mabaskog nga pagpamatuk diri sing tuman kadamu nga pungsod kag pumuluyo. Sining Septyembre 6, pinal nga gindeklarar sang US *weapons inspection team* nga wala sang *weapons of mass destruction* ang Iraq sadtong 2003 kag "nagsayup ang mga tekniko sa pagtumod sang mga ebidensya kag magkuha sila sang mga sala nga kongklusyon." Antes ini, gindeklarar na sang UN nga iligal kag unilateral ang ginbuhat nga pagpanalakay sa Iraq. Bisan si Tony Blair, *prime minister* sang United Kingdom kag pinakamasupog nga tagasuporta ni Bush sa pagpanalakay sa Iraq nag-ako nga indi bastante ang mga basehan sang paglusob nila sa Iraq.

Sa sulod sang US, padayon na natum-ukan ang kadalok sang mga monopolyong korporasyon, mga korporasyon sang langis kag sang

padrino sang mga ini nga si Bush bilang pangunahon nga kabangdanan sang pagpanalakay kag pagpanakup sang Iraq. Pila ka beses na nga ginhimutig ang maluya nga balibad ni Bush nga may *weapons of mass destruction* ang Iraq, nga ginatago sini si Osama bin Laden kag iban pa nga operatiba sang Al Qaeda, nga si Saddam Hussein demonyo nga nanging-tawo kag iban pa.

Nagbaskog ang disgusto sang pumuluyong Amerikano sa nagapadaku nga numero sang mga nagapatay kag nagapilasan nga mga suldado, hayag nga mga kapalpakan sang ila sistema sang paniktik kag wala-tuo nga pagbinutig sang rehimeng Bush. Indi man matago sang rehimen ang bangis kag kalakasan sang pagpanakup sini sa Iraq. Samtang nagadugay, labi nga nangin mapintas ang mga pamaagi kag taktika sang mga naipit nga pwersang Amerikano sa Iraq. Labi naman sini nga ginapainit ang kaakig kag pagkangil-ad sang pumuluyong Iraqi sa ila.

Ang solo nga nagapugong sa pumuluyong Amerikano nga ibasura ang rehimeng Bush kag ang mga ultra-Tuo nga polisiya sini amo ang pagpamahog kag ginatuga sini nga kahadlok kaangot sang kuno permi nagahana nga pagsalakay sang mga terorista sa US. Kon batuan ini sang mas madamu nga pumuluyong Ame-



rikano, mahimo nga mabasura ang rehimeng Bush sa maabot nga eleksyon. Mahimo sa eleksyon mapatampok sang pumuluyo ang ila pagpamatuk kag pagkunderar sa imperyalistang pagpanakup sa Iraq. Mapareho ini sa nagalanog nga pagkalutos sang rehimeng Aznar sang Spain sadtong nagligad nga tuig sang ginbasura sang pumuluyong Espanyol si Jose Maria Aznar kag ang partido sini sa eleksyon. Isa ka adlaw bag-o ang eleksyon, ginbomba sang mga Al Qaeda ang pila ka tren sa Madrid bilang pagpakita sang pagpamatuk sa pagsuporta ni Aznar sa gera ni Bush.

Samtang nagahilapit ang eleksyon sa US, madamu pa nga kabutigan ang mabuyagyag kag magatampok. Matilawan ang rehimeng Bush kag mabutang sa alang-alang ang pagpadayon sang paginahum sini. Kag samtang nagaatubang ini sa wala-kasiguruhan, ginakakulbaan nga madula ang ginasandigan nga pader sang mahuyang nga mga iduido sang rehimen sini pareho sang rehimeng Arroyo.

AB

Nagatinambak nga kaswalti sang US sa Iraq

Nagaabot na sa 1,055 suldadong Amerikano ang nagkalamatay sa Iraq halin sang mag-umpisa ang gera sadtong Marso 2003 tubtub Oktubre 4 subong nga tuig, suno sa Pentagon. Nagaabot man sa 7,245 ang pilason didto pag-abot sang Septyembre 15.

Wala pa nalakip diri ang maabot sa 16,765 sulda-do nga gin-ebakwit bangud sa sarisaring balatian. Wala sila ginareport sang Pentagon bilang mga kaswalti bangud wala kuno direktang may kahilabtan sa kombat ang ila mga balatian. Suno sa isa ka pagtuon sang militar nga nagguwa sa *New England Journal of Medicine* sadtong Hulyo, nagaabot sa 16% sang mga suldado nga naghalin sa Iraq ang mahimo magbatyag sang *major depression, generalized anxiety* ukon indi *post-traumatic stress disorder* kag iban pa nga mga sikolohikal nga balatian.

Sadtong Agosto, nag-abot sa 87 ang abereyds nga numero kada adlaw sang mga atake batuk sa mga pwersa sang US-ang pinakamataas nga pigura halin nga gin-anunsyo sadtong Mayo 2003 ni Presidente George W. Bush sang US nga katapusan kuno sang gera sa Iraq. Halin sining Hulyo, nagapalapad nga nagapalapad ang erya nga ginaluntaran sang mga atake nga ini.

Sining Septyembre, sunod-sunod nga mga pagpangbomba kag pagpang-ambus ang ginlunsar sang mga gerilyang Iraqi. Isa ka halimbawa lang diri ang *suicide bombing* sadtong tunga-tunga sang Septyembre nga nagtarget sa duha ka salakyan nga may lulan nga mga suldadong Amerikano. Pito ka tropa sang US ang namatay.

Patimaan sang ila desperasyon, lubos kabangis naman nga nagsalakay ang mga suldadong Amerikano, ilabi na sa mga banwa sang Fallujah, Ar Ramadi, Baqubah kag Samarra bangud ginabilang ini nga balwarte sang mga gerilyang Iraqi.

Sa Fallujah, indi magnubo sa 11 katawo ang namatay sa duha ka *airstrike* nga ginlunsar sang mga tropang Amerikano sining Oktubre 4. Sa una nga *airstrike*, siyam ka tawo ang namatay, lakip ang tatlo ka babaye kag apat ka bata. Napulo'g duha man ang napilasan sa ikaduhang *airstrike*.

Sa Samarra, 70 katawo na ang nagkalamatay halin nga naglupok ang mabaskog nga inaway sadtong Oktubre 3. Kadam-an sang mga namatay mga ordinasyon sibilyan. Baynte tres sa ila mga bata kag 18 ang kababaihan.

AB

Di nabayaran nga "cash advances" ni Arroyo, ginpakamalaut

GINPAKAMALAUT ni Rep. Crispin Beltran sang Anakpawis ang iskandaloso nga kadakuon sang mga "*cash advance*" ni Gloria Macapagal Arroyo nga indi pa mapaathag tubtub subong kon sa di-in kag paano nagasto. Base sa report sang Commission on Audit (COA), ang Office of the President may P626 milyon nga *unliquidated cash advances* halin 2001 tubtub 2003. Lampas ini sa rekord sang anuman nga pangulo sang pungsod humalin kay Ferdinand Marcos tubtub kay Joseph Estrada kag mas daku pa sangsa gintipon nga *unliquidated cash advances* sang tanan nga anay presidente halin 1965.

Suno sa report sang COA, ang kabilugan nga *unliquidated cash advances* sang mga anay presidente nagaabot lang sa P159 milyon: Marcos, P41 milyon; Corazon Aquino, 11 milyon; Fidel Ramos, P55 milyon; kag Joseph Estrada, P50 milyon.

Mga upisyal sang Davao City, Batuk sa panibag-ong Balikatan

KOLEKTIBO nga nagpabutyag sang ila pagpamatuk sa panibag-o nga Balikatan ang 133 sa 180 kapitan sang barangay sa tatlo ka distrito sang Davao City sadtong Setyembre 22. Ginsumiter nila ang ila manipesto sang pagpamatuk sa Sangguniang Panlungsod. Ini labing una nga pagpahayag sang mga lokal nga upisyal batuk sa Balikatan ginsaksihan ni Ret. Capt. (PN) Danilo Vizmanos, convenor sang US Troops Out Now kag Junk VFA.

Suno sa mga lokal nga upisyal, ang mga suldadong Amerikano magasabwag lamang sang gamu kag magadabuk sang mga protesta kag teroristang atake. Siling nila, wala pulos sa pumuluyo ang gintingub nga paghanas militar sang US kag Pilipinas.

Plano nga ilunsar ang Balikatan sa mabukid nga Marilog district sang Davao City sa masunod nga tuig. Magapartisipar diri ang 4,000 suldadong Amerikano kag Pilipino kag magalawig ini sang tatlo tubtub apat ka simana.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXV No. 19
Oktubre 7, 2004
www.philippinerevolution.org

Editorial

Pasingkion sang Bag-ong Hangaway sang Banwa ang mga armadong opensiba

Igalunsar sang Bag-ong Hangaway sang Banwa (BHB) ang nagapadamu nga mga armadong opensiba batuk sa rehimeng US-Arroyo. Ini ang sabat sang BHB sa panawagan sang Komite Sentral nga pasingkion ang armadong rebolusyon bilang sabat sa walay tu-pong

nga krisis nga ginalumuyan subong sang pungsod. Ini man ang sabat sang BHB sa mabaskog nga demanda sang pumuluyo nga silutan ang rehimeng US-Arroyo.

Mismo ang rehimeng US-Arroyo ang nagaduso sa pumuluyo sa dalan sang rebolusyon. Walay latid ang pag-ikog-ikog sini sa imperyalismong US. Masupog sini nga ginapatuman ang pinakamalaut nga polisiya sang liberalisasyon,

pribatisasyon kag deregulasyon. Kahimbon ini sang dalagku nga dumuluong nga korporasyon nga padayon nagapuga sing superganansya halin sa nagaantos nga pumuluyo. Ginahayag sini ang kaugalingon nga baho kag kagarukan sa walay untat nga inaway sa ila kubay kag serye sang nagakahublasan nga mga anomalya kag kurakutan. Malaut sini nga ginasuportahan ang imperyalistang agresyon kag sa bibig pirme sini ang litanya nga "gera kontra-terrorismo" sang US agud hatagan-rason ang pasistang pagpanalakay sini sa pumuluyo kag imbitahan ang pag-interbenar sang US sa pungsod. Pat-ud ang pagbaskog sang kahublagang masa sang pumuluyo nga wala na sing masaligan kundi ang maghulag kag magbatu. Tay-ugon sini sa pinakaubod ang daan na nga mahuyang nga pagginahum sang rehimeng US-Arroyo. Kadungan sini, magalunsar sing nagapadamu, nagapabaskog kag mas masunson nga mga taktikal nga opensiba ang BHB bilang suporta sa pagpahamulag kag pagpukan sang rehimen.



Mga tampok sa isyu nga ini...

Arturo Tabara, masupog nga kriminal kag kontra-rebolusyonaryo
PAHINA 3

Pakusog kag pagpaniplang, katuwang sa pagmina sa Samar
PAHINA 5

Pagabayaran ni Bush ang gera sa Iraq
PAHINA 9

Mga instruksyon sa pag-imprenta

1. Ang pahina 13, nga eksakto nga kopya sang pahina 1 maluwas sa mas malus-aw ang *masthead* ukon *logo* amo ang para sa mga nagagamit sang *mimeo machine* ukon naga-imprenta paagi sa *v-type*. Gindisenyo ini para indi madali masamad sang istensil.
2. Pag-imprenta sa istensil:
 - a) Sa *print dialog*, i-check ang **Print as image**
 - b) Kuhaon ang *check* sa **Shrink oversized pages to paper size**
 - k) I-click ang **Properties**
 - d) I-click ang **Advanced**
 - e) Siguruhon naka-set sa 100% ang **Scaling**
 - g) Padayunon ang *pag-print*
3. Ginabuyok ang mga kaupod nga ipaabot sa patnugutan sang *AB* ang anuman nga problema kaangot sa pag-imprenta paagi sang *v-type*. Magpadala sang *e-mail* sa *ang-bayan@yahoo.com*.